

近代中國史料叢刊第三十一輯
沈雲龍主編

乙亥叢編四種

王大隆輯

文海出版社印行

乙亥叢編

蔡晉鏞
署檢閱

W-1177/11

豔情密語多在到仙弄小樓上也五月浙中聞警叔兄屢書促返業登舟矣又得急足書予詞有已分不成留歸計今朝準何苦西風抵死催颯颯吹帆影蓋指此也途中相思頗切病酒傷離倚聲自遣今刻淞夢詞十數闕皆爲紅豆樓主人作也已未叔兄還朝李蕤客赴官王九亭與予入覲結伴北上繞道吳淞勾留二旬餘復晤阿男而綠陰子結矣仍欲舍之踐盟予力卻之自後由都返里徑詣閩中不飲吳淞江水者二十五年矣盧氏張氏主人久已歿故寓樓故址不復可尋舊同游者珊士艾臣琴子九亭墓木成拱洪氏兄弟潦倒已久踪跡不復可知諸姬更無有知姓名者矣蕤客五十登第老尙爲郎予一官不保垂白謹戍羈旅障鄉窮餓不堪惟叔兄矚列中外位至三品資擁巨萬年未六秩得遂初服最爲多福今日舊地重游追懷前緒動觸悲端剪燭寓樓拉雜寫此陳跡難尋去壯不復老淚盈襟幅矣俟叔兄到日與共追話昔游當亦同深感慨也

十六日寓海上已四日久客閩地窮僻少文今來此遂覺飲食起居無不適意山水

人物都蘊秀氣昨山大馬路過洋涇橋光景猶彷彿可識憶客盧氏日嘗與叔兄于日落時偕步橋側水邊閒話輒踰時許或同行至陳心譜家茶話叔兄每爲挽留則予獨步訪阿男兒時舊跡一一可溯而垂白重來心情潦倒真如華胥夢醒也 十三四夜在天仙觀落金扇劇演明武宗大同幸劉氏事蓋本玉搔頭而變之者也亦用崑曲故關目情節不致荒謬其入院設飲龜鶴諸姬及侍婢輩裝飾言語皆效海上堂名時習形容仿效極情盡致頗足解頤 從吉雲假春江燈市錄錫山鄒生著紀滬夷界瑣事頗詳而筆墨繁蕪去清嘉錄揚州畫舫錄殊遠遑論夢梁夢華也又春江花史二卷記海上諸姬人爲小傳更不佳書共四卷坊賈刻行改名花天酒地傳以中有譏某鎮戎語屬幕客以百金購悔其板今已不行故借看 十九日至抱芳閣看黎尊齋公使古佚叢書數種爾雅宋蜀大字本穀梁傳宋余氏本又漢食貨志並紙墨精極

二十五日人至晚年貴自適意游宴諸事當量力定行止若必強已從人徒自苦耳

予不爲治游已十餘年然友人強之招侑酒者無不應但不創議自我始也

六月初六日凡聲色諸事當少年氣壯血王又雜以好勝之心必得爲快因生慕戀志遂爲移及閱歷已深回想前塵直同嚼蠟微之所云取次花叢嬾回顧眞悟後人語也

十三日海上人多喜乘馬車挈伎游靜安寺每屆外國禮拜日泊先一日申酉閒游人尤盛炎暑月夜則有亥子往丑寅反者其地祇一申園中惟一樓及兩軒卉木極少旣無竹樹池石長廊曲室爲之點綴鮮可悅心游者交申酉後買馬車奔馳而至坐廊下飲茶一壺看男女雜選出入往來拍肩交臂上下登走座不及暝天將薄暮于是紛紛登車轆轤輪響頃刻間如鳥獸散游者亦復從衆馳驟而歸試問此游有何可樂而好之者日必有人殊無謂矣予謂涼夜月好十三以後十八以先于鋪飯後約佳士二三各攜解事雙鬟挈笙笛鼓板乘月而往于廊下隨意列坐烹佳茗一甌諸姬則修篴調笙歌崑山曲一兩闕與諸友啜茗當風倚闌聽之彼時風景定當

不惡然目中意中士女鮮能稱此游者則亦徒有虛願而已靜安之游叔兄與予皆不以爲然客有招者每多謝之願予從者張對好步行浦灘歷諸馬頭看輪船行止津津道說意謂樂無過此者日必一行不爲厭倦其無謂又百倍于靜安寺矣生人之好其不同蓋如此天下民情豈易測哉一笑

二十八日午初忽雨及未漸大獨坐枯悶過精一閣買陸敬安以滌冷廬雜識八卷以遣朝夕陸桐鄉人以壬午舉人丙申進士官教諭頗有文名此書刻行于丙辰歲譚仲儀曾以餽予經亂失去不見廿六年矣老復繙閱回憶兒時頓生感慨卷中所記著時彥詩詞多二十二三時舊識閱其名氏多登鬼錄感念逝者尤足悲矣雜識筆墨不蕪不蔓不媿文士吐屬與近出時髦筆記諸種有蟬蛻之別三十年前先輩沈潛嗜學固非邇來名士腦滿腸肥束書不觀者比也

七月初二日子性躁動喜奢華故自少至老以看戲爲最樂次則廣州下塘艇中之飲又次則虎阜燈船之游喜其兼有江山絲竹伎樂之勝也又次則狎邪聚飲以糾

酒人多爲快若一室並膝爾汝啁啾柔情私語性不近也少年時猶或未能免俗三十歲後絕不作此情話也所不改治飲者翠袖成行綠酒連罍士女羣展左右陪侍頗足舒牢騷發豪興耳然此數事者祇有好書數卷未經覽者棊几一編默然靜對便可沮我繫鞵矣故自計生平嗜好究以卷帙爲最昔人云依之爲命藉以延年八字可謂先得我心

初三日昨聞都中法使下旗出都戰計已決香生來言廿八日在閩啓行見法兵船十艘根鉢三艘全在馬港我防軍雖衆多未練習事殊可慮

初六日昨益甫爲言先法會孤拔以兵艦聚泊馬港內則水雷密布又有火船千餘集屯上流外則我輪船戰艦星列棋布左右兩岸砲臺逼近彼軍深入戰必四面受敵聚而可殲于是卑詞請我大帥令我船讓此出路俾救東京之急云云幼帥卻以權操總署孤拔遂電寄法使轉請不意不虞其詐諭飭幼帥縱之出口迨彼既出陳于羅星塔江中我反被圍于內與長門水陸之師首尾隔斷長門口外法又以鐵甲

一艘據以沮我
我師爲所反攻
也任令出口往
是無心肝人也
不幸而中可痛
各分四五馳入
之隻輪不出若
至事殊不可問
之隻隻爲法占
十一日聞中朝
必救也 閩中
不符我之虛實

之國有戰事人船炮械煤米各種皆不得相濟此公法也各島夷之在中國服役者鐵甲之造自德國者皆以公法爲詞不令與于戰事而法在閩募帶水洋人近又傳購煤日本皆可不守公法而我亦不以責與通之國也今且雇我華人矣而素日之隸彼教者爲服役者且悉甘心反戈焉而我欲得一細作以探敵情者無之嗚呼可一哭也 少日在大兄處得彭甘亭先生南北朝文鈔以選錄精美攜在行篋日夕瀏覽洎已未出都書在叔兄案頭忽忽未檢以隨後不知爲何人取去函索不得卅餘歲來訪人閱市訖不再見昨忽于萬卷堂中無意得之大爲忻慰也倘熟讀此帙百篇受用不盡矣

十二日恭讀初七日上諭宣布法夷種種敗約尋釁始末決計攻討憤激爲抒惟惜略遲旬日耳使聲罪致討能在六月下旬不致有閩港之創矣

十八日制軍命方陳二道募潮勇萬餘人駐城之日橫肆無忌在通衢間調戲婦女市人大譁勇遂荷火鎗行炮以出塵肆間幾至罷市幸福守張笏臣撫慰鎮壓始得

息事今雖以林穎叔陳之制軍命札營長門而以凱字營駐館頭閩軍守城以相鈐制而強弱不當故艇筮昨語子紹閩禍未已屬轉致葆芬速速航海行也 初四日中法戰後英領事于初六日晉謁制軍士民大噪聚圍督牙毀及堂皇屢訪福守再四婉告哀乞乃止近日民間共謂潮勇通裔以穆將軍在長門禦敵命之開砲不應也因而謗及制軍泊海防同知王冕南侯官令羅大佑更以撫軍不力主戰爲恨四人者出則聚圍其輿肆口詆罵又自六月下旬市中柴米屢絕雖挾重貨購米不得民不畏官軍不守律薪桂米珠此鄉誠難居矣

十九日初三日之役我船統帶各官猶在岸上故揚武還擊二砲之外餘俱束手待擊無發一砲者幸穆將軍在長門與敵相持數日炮毀其載食一船是以孤拔恐爲截沮于內全師出口也此言得之性之

二十日昔張遼求交胡質質謝之遼問其故質曰古人之交多取知其不貪奔敗知其不法聞流言而不信是以可終武伯南身爲雅士往者將軍稱之不置今以睚眦

成隙如質才薄豈能終好是以不願也偶憶胡質語錄于右方以自敬省 國士之才識肝胆得一勝百常人與其以萬金養百常人不如以半奉一國士可使感而效命也古云千金易得一將難求誠哉誠哉今之大人先生多好分國士之奉以示惠常人以為得一人感不如得多人感也不知常人必不能感激效命而國士則反寒心也以為得計然乎否乎

二十二日予于中興將相最服膺者曾文正胡文忠左湘鄉三人近讀文正全集益于其德業文章俯首欽心故凡見公尺帙寸箋無不收弄在滬行日購弟子記家書二種自登陸後日讀家書如親訓誨自覺言行舉動處世處家直無一是詒自三十歲後不作誑語不欺友朋故所交正人十數頗相信重獨于兄弟每覺見信不如朋友頗懷芥蒂不無腹誹背謗不滿意存膜視諸見益耿耿之心皆小人之缺也今思總由已誠未至且自恃已才滿而驕矜宜乎其水乳之未融矣嗣當一以誠敬事兄盡弟之職至于兄之愛我信我外我與否不必計此庶不枉讀湘鄉家書一過也

二十三日凡人子弟所長所短皆當直陳于君臣父兄之前庶冀原其短用其長無嫌疑之迹詒之爲人任事能任勞怨一絲不苟性直慷慨若遇知己卑詞厚禮言聽計從能知恩報恩不欺不飾此其所長也

必忍乃有濟有容德乃大二語是詒對症藥也

作事太銳自信

太過迹有若專擅攬權又不能謙和遜抑而嫉惡如仇動加聲色信人太過不免護短故易招羣小忌嫉而一聞誹謗氣湧如山不能忍耐憤怨交作此其短也今于國則廢棄終身矣于家則歸鄉無日矣其長無可用其短亦無由改嗚呼痛矣 聞電報傳上諭命左侯相督辦閩省軍務穆揚幫辦船政何子莪召還以張又樵代之林穎叔以四品頂帶授爲團防大臣諸授委在閩戰先或不致縱敵深入近以殘敗法必無再來之理如此張皇不同于賊出關門乎與其事後鄭重何前之開門揖盜也政府措置不量緩急聞之不勝孤憤 兩宮主戰聖意堅定如此而全身保妻子之流動以蒼生塗炭藉口竊議一意主和詒恨不手刃之總之值此時局舍戰一字更無他說勝固足以立中國之威萬一致敗亦從此激天下之忿此予十四日在聚豐

飲次痛詈香生憤極聲厲也滿

不堪也

此等論議大非危行
言避之道後當炯戒

顯露顯露卽驕矜也客氣也

二十五日詒于六朝駢文自四

購得彭氏選百篇本欲熟讀能

加以句讀而日誦百餘字以十

勿懈退或冀能終帙也自今晨

周初明羈繼得佑釋歸詒頌數

生還也乎

晨讀駢文十遍看十葉

句讀

未後寫字一百

此不限日一

燈下看史三十葉

如夜有惠
漢書前後

每日辰正起洗沐後先看雜書俟神氣清定乃看駢文十葉訖朗誦一篇以百五十字日十周爲程爛熟乃易午未後無應酬談燕遊走則臨隸帖百餘字聊以遣日而已不必完也鋪後看三國志十葉要專心篤志一字一句不輕放過此專門終身之業也訖看史記前後漢太平御覽通典唐諸類書隨意以二十葉爲限但看一書必首尾周遍不竟不易他書守之以恆切切謹記如夜或出應人招則于次晨撤看書補完三國志十葉

亥子間就臥至遲不過丑初

晨看雜書以通鑑輯覽涑水通鑑爲常業有他書則代之無則仍接看以廣見識夜看諸書皆以校國志也非于陳書裴注相輔之書概不覽及以專己業

予之于瀏覽書籍一卷到手不肯暫釋迨易他帙亦復戀戀更加厭故喜新愛博不專皆學者之大患也故必限以葉數力戒舊習

二十六日昨葆芬得警欲趕今晨登舟附海琛北發予思法人如昨攻長門圖爲久

據福州之計則海琛廿七日必不能出口南駛當俟勝敗已分乃復出口但登舟之後可出則出不必更候別舟耳惟星察里先日出告曰以法人必不再犯福州勸民之徙者速回未徙者卽止云云若法果再來獨不懼士民之怨而殺之乎然猶得曰法人狡詐殺英人與法無害也顧法舟七艘并後來二艘共來閩者九船船以大小人以多少并而計之約每船三百餘人統祇二千七八百人船至馬港惟小者二可至臺江餘更難深入勢不得不以百餘人坐守則登陸滋擾者不過至多千八百人馬港距南臺水陸俱六十里由以入城又十許里以千八百人懸師入城水陸懸隔呼應不靈又且異言異服獨不懼民間英傑于昏夜中振臂一呼同心奮擊焚殺並舉乎孤拔雖一身是胆吾料其必不敢也 予秉質太弱又不自愛吸食鴉片益多懶散自知不勤不密于家于國皆不任統帥之責但參贊董率建議指揮不可謂非好才也惟近日精力日鑠不耐用心筆墨在案望而生畏此次軍興同人多以此復起屬望于予其意誠厚然廢居九年貧病憂患暗耗心力斷不堪任艱巨如十年先

矣善刀而藏立志已決

二十七日性之來說外間哄傳洋人買茶以初三日起數再展三禮拜各帳了結以孤拔接法廷電寄必取福州也其言予究不信洋人結帳蓋統指各口非專爲福一隅言閩港爲海口中易守難攻之最長門天險尤不易攻經此次敗創之後當事如穆如張尙有血性宜必精選將領練習槍炮力沮其人以雪前恥總之與外裔戰水師未必勝之陸戰則我十九勝也但堅守半月十日彼攻不得入煤藥飲食將盡必走無疑近傳法人在白犬芭蕉諸山造望樓屯兵糧此說萬不足信彼以船爲巢穴水陸必氣息相通白犬等洋面不能聚旋多船以風浪惡也必無此理若爲代計則閩浙之交南北關山洋面殊足慮也 若閩未經創則事勢難必既敗之後反有把握也昔英法陷廣州擄粵督而我不與和閩粵一也彼豈不知我視福州無關大局乎

二十八日自壬午後天象示儆水旱頻仍各省大吏泄泄沓沓謹于小節忽于大事

務虛聲無實用用人不公用財無節天人二端無一足恃又自去冬以來市道敗壞民窮財盡清夜之中一爲設想真不知天意何如也王尼云天下橫流處處不安今日以後時正與同但當委身任命而已自古有國有家者禍難之起始于一隅不及經年蔓延天下不可收拾其機甚微發于不覺實皆由于燕安鳩毒也中興以來十數年間因循二字爲禍深矣隱憂孤忿其何能已我家兄弟身名俱泰福祿雙全無有及叔兄者使今春不以微罪開缺能如此優游自在乎故一再思之不必爲之籌劃焦灼也若予薄福亦當得過且過更不值用心無益之地生死饑飽一聽之天可矣 讀沈初明上武帝表五十遍益能上口且似有微得比在江讀書疾讀必五六百遍者爲益殊多可知得益與否全在心專不在讀之多少也 吾少厭聞迂腐語初讀湘鄉家書微恨有頭巾氣久久思之聖人遺訓究不可不遵老生常談究不可厚非叔兄論事每多書語初覺其不切事情今反覺兄于學中比我有得予之被禍遭讒皆由聞謗不做悍然不顧良由無人以聖訓敬覺之耳予之性剛得父氣爲多

兄之性緩得母德爲多五兄本性忠厚父母之遺也

二十九日吾思用功誦讀文不必多少則五十多至百篇足矣而瀏覽不可不富以救儉腹今以彭氏文鈔爲讀本而以文選駢文鈔古文辭類纂備覽日閱以二篇爲限亦日知所無之意乎 學文不當專從事于文經史二者並不可缺少不努力老知門徑嗚呼晚矣 文正寫日記必工楷一筆不苟用爲收攝身心之一事予嗣雖不必楷書日必數十字或行書稍稍端正勿草率予作字收筆拖下大是痼病必求改之

文正自定日記以八事自課詒擇其有關者增刪其目

一曰看書夜早 二曰讀書 三曰作字 四曰辦事 五曰出門 六曰對客 七

曰書札往來 八曰寫日記酌事有見別書于首

一早起 二早睡 三讀書不二每看一書首未必周 四讀史 五謹言 六保身 七日

知所無 八月無忘其所能

明日八月朔另易一册起矣此十六條揭於首葉以當凡例

竊橫日記鈔卷中

祥符周星詒撰

吳縣王大隆輯

客閩日札

甲申十二月起除夕換一册更始此并前二册合訂爲一自閏月十日至今二百餘日中舟車奔馳風濤寢食顧求俯居團聚一勞永逸不可必也

噫

甲申十二月初四日看葉潤臣觀察橋西筆記有云唐慧琳大藏音義一百卷今亦不傳近自倭人傳入中土卽此書也 雍正七年授禮尙陳元龍左都尹泰爲額外大學士爲今協辦之始康熙間漢大學士三人以仍內三院之舊大學士銜加殿閣始于順治十五年七月裁內三院至十八年六月裁內閣復設三院康熙九年八月復改三院爲內閣十月改大學士銜加殿閣兼尙書學士兼禮侍 乾隆十三年定滿漢各二員協辦滿漢或一或二員殿銜不列中和增體仁之名殿閣銜各三矣 順治五年定三院滿大學士一品漢仍五品以兼尙書爲二品十五年改殿閣名滿漢品制仍舊康熙九年定俱正二品兼尙書銜時亦二品雍正七年升爲正一品乾隆五

十八年上諭職居正一毋庸題從一銜 內閣大學士直舍爲堂三間堂外懸機密重地一應官員不許擅入違者治罪不饒順治十一年五月二十四日旨也清漢書刻金字 初各官請封典漢中書撰文擬進寫軸頒發乾隆中彭文勤奏請撰定京外文武官誥勅文不必隨時具草遂爲例 雍正七年青海用兵于隆宗門內設軍需房選中書敏慎者爲章京後改名軍機處沿至乾隆末而章京不盡出中書矣

道光二年壬午十二月二十四日內閣中書直廬災直宿者鮑庚也

阮葵生云章疏如山堆積隨手

抽看如獲至寶至此爲然

皆見葉記

予兄叔昀言奏辦院事日

俗稱情秘堂怡林

日必至衙門辦事聚

集于敬善亭之左右室中堆積書籍如山明朝歷代實錄及修史日采進備用各書洎各省進呈四庫館書原本奉旨發還而未領者經百餘年抵換盜竊之餘猶連屋充棟也中有兩室垣宇倒塌書籍檔案遍地皆是磚瓦所壓幸北地乾燥不致梅爛閱今二十餘年不知如何矣予少嗜書又好究心朝章國故遺聞逸事每聞此說不禁心嚮往之恨不得不置身其間一爲檢整稽覈而身親者乃漠然聽之沉埋毀壞

絕不顧惜每與節之述之同深浩歎 素問云飲食有常節起居有常度不妄不作

林億校云全元起注本

胡澍校義以爲作卽詐古字通也予自四十歲後頗于古賢樂天任運

之理有會故十年來奇窮極困皆能泰然處之天君曠達眠食酣適絕無疴疾卽不妄不詐效也 葉氏云宋溫陵曾慥集穆天子傳以下二百五十種爲類說後世叢

書所由昉也詒案類說節錄各書如南朝庾氏子抄唐馬氏意林例不同後世叢書

彙萃古書首末完善一仍舊貫比也其創始可據者實自宋左氏百川學海至明季

胡毛諸刻而大及乾嘉間二盧

雅兩經畢

孫份南平津鮑知不足齋黃澐壽孔微

波孫問經而精美極矣 雍正三年改至聖諱音讀作期上諭除四書五經外凡遇

此字並加卞旁地名亦不改易但加卞旁讀期 詒中年思集錄七緯校寫定本以

翼諸經而示世人以西人之學淵源之自所藏古微書外有趙在田七緯陸明睿輯

緯陳恭甫太史父子輯錄稿本陸陳二本世少流傳尤爲難覩擬以此四書爲藍本

更搜采經子史選注及宋以先類書爲之增益校讎然緝檢校寫非一人能任必延

同志二三人鈔胥四五人相佐且以旁及三國會要急就章箋二書乃在官之日尙苦無力及得謫後衣食窘迫精神消鑠更不能事此矣近盡售藏書蔣氏付此二書日諄諄語之但以原本付梓不使失傳爲屬不知能從否也詒束髮嗜學于著述校讎門徑微有所窺少壯之日有志讓作聚書十數萬卷行篋自隨未嘗一日釋卷者三十年苦多病體弱臥多坐少懶于握筆記錄又所官地瘠且陋無書可借無士可延又旣廢居多閒又乏資力今垂老矣一字不成每一思及黯然自惜而已 兪理初先生曾爲問經堂孫氏緝有緯書見葉記先生淵博冠冕當時其書必佳惜問經叢書流傳印本多少不一藏書家罕有完帙不知其書已否刻行也

初四日少聞婢媼輩言及狀元輒曰天子門生願其說亦有所自宋史選舉志舊制秋貢春試皆置別頭場以待舉人之避親者自總麻以上親及大功以上婚姻家皆牒送惟臨軒親試謂之天子門生雖父兄爲考官亦不避則四字之稱天水朝已有之且疑源于李唐也

初六日古今名手記事之文字字著實無一蕪言欲求節刪一字而不能自道咸以
來雖以文名者其詞繁語觸目皆是隨手汰去仍然明晰相去遠矣 傑之以粵

謳一册送閱聞亦招大令作也大令風流倜儻善歌工琵琶卷中畫一少年坐石上

彈琵琶者云卽其小象也謳凡口闕卽粵中之摸魚腔也吐屬清雅不媿才人卷首

有題詞二首一爲沁園春詞

題紅蓼洲邊漁者

一集司空詩品

題九天

亦都不俗此謳初出

在道光戊子沙面諸姬咸能歌之至今狎邪中猶傳唱不絕所稱解心者卽以帙首

一闕得名亦名流韻事之足傳者也粵伎皆蛋女士人賤蛋人目爲水面不與婚嫁

亦不容陸居其種凡十三姓自相配偶結寮水上以漁爲業稍有資則移家舟中婦

女有姿首皆令爲伎蓋亦不得已也故所歌猶曰摸魚云 凡通都大邑冶游之地

如秦淮吳門諸區選事文人每爲記載遺聞佚事飲食服飾及名姬姓氏分門著錄

各有專書粵中珠江之盛著聲已久願僅散見各書且有寥落不詳粵士多文流寓

亦不乏名士而使考土風者獨不得教坊青樓之錄撫今追昔亦一憾也每與子詮

言及爲之慨然 夢厂隨筆有潮嘉風月一卷記六蓬船中諸伎皆嘉道間事筆墨庸俗不足觀也子詮海陬冶游錄附粵姬數人而於其中土風俗尙遺聞舊事一語不及予所見祇沈三白筆記言之略備雲衢桐陰清話記贈聯亦多佳者

初十日酉刻作答叔兄書未竟忽得蘇來電寄痛悉叔兄于初五日臥病初九日寅刻棄世慟哭失聲肝腸摧裂叩別音容甫經匝月初六之辭此生永訣痛哉痛哉初七八日連得廿九初一日寄諭手澤猶新訓教周摯思慮精詳未及旬日慘聞噩耗誠思慮所不及也痛哉詒年十一卽從兄讀出入追隨形影不離者數年及兄授室夕乃分床每清晨迄子夜居則周旋一室相對讀書出則步履追隨笑談必共苟非遠游無一日不侍左右者蓋又十四年自詒赴官閩中始睽南北及兄簡東鱗詒迎叩梧州共晨夕者又半年去今夏間暫聚卽別及九月挈眷僑滬方期暮年兄弟歲得相親十月六日以聞兄病至吳省視晤談一月以事言歸是日自朝至丑眷戀異常殷殷以二萬金許助屬買茶票完案或邀恩釋得踐白首同居之約詒旋以官事

迫促來聞自此之後色笑常違痛念生平不覺涕泗之沾襟如雨也哀哉哀哉兄于諸兄弟中相待特厚詒每以生性剛傲論事牴觸時或齟齬數日之後兄必手書撫慰故始終友愛彼此相鑒以心也兄和平本于天性微涉迂緩詒剛躁每于兄處事輒多譏議兄每含容之前月十口日手書猶云兄性柔緩弟性剛急各得其是其曲意獎借每此類也嗚呼手書在篋紙墨猶新展讀感激如之何不悲哉每念一事號哭失聲氣喘聲嘶心驚不止予自獲譴後驚憂成疾每夜就臥如覺床榻震動肉顫心跳三數年來更不復然連夕此疾微作昨宵則徹曉心驚反側難安心知必有不祥今日果有奇變患難餘生羈縲障域自此死生路隔而湯藥不侍含殮不親並不得星馳奔赴臨喪一慟哀矣來電譯至寅字駭絕而慟擲筆號哭不能終幅用卿爲之代譯方知遺命繼乾姪爲後又蕩生以身後事作何辦乞示因立作札答之屬就近稟承五兄主持也

二十六日五岳改稱某山之神始于明太祖洪武初祭告泰山碑文云予起自布衣

不敢循舊典妄加封號敬稱曰泰山之神康熙己未遣官祭長白山集議封典部臣覆引五岳例因洪武舊也見廣陽雜記

乙酉正月初七日買薑露彙雜記化學衛生論二種雜記六卷不著名氏但題駢渠道人按之卷中自述知爲施姓山名號望雲吾越人也所記論詩語居其半多中肯綮間載已作亦有思致餘或考古說理筆甚明晰雅淨近出小說中錚錚不凡者矣核其蹤跡多在兩楚疑幕游郡縣客也 化學衛生論向在格致彙編中零星見之今彙訂成冊另出疑爲全帙而仍祇上册不知何以不全譯也原書爲英吉利人真司 撰羅以司爲補缺正誤近傳蘭雅譯授格致館生始于己卯訖于壬午僅得三之一耳前有琴隱詞人序

十四日昨電傳上諭到閩張佩綸發新疆何如璋發軍臺效力左楊以褊袒申飭又聞電傳上諭飭催揚厚帥陳軍門迅速渡援并以基隆一隅爲法人踞守未能克復左侯劉撫均奉嚴旨有國法具在惟左是問諸諭近以中法接戰臺島越南馬江石

浦水陸諸軍屢仗敗績法會示戰海口爲杜遂紛紛歸咎當日主戰諸君中朝處分亦微有悔意矣然自道光以來各島裔恃強凌侮恫喝要素日甚一日日本倭國區區三島亦復奮臂逞凶郎嶠之役既輸以金中山之佔直置不問致法人效尤圖踞越南全土始謀不臧又不善後今日勢成騎虎若不議戰益招侮矣蓋戰而勝從此振中夏之威萬一而敗亦藉以奮華人之志所祝兩宮堅持定力而已悠悠之輩苟幸目前彼哉不足齒也十年中廷臣之錚錚有聲者張湘濤又樵寶竹坡黃漱蘭陳伯潛共推爲清流冠冕寶骨鯁耿介特以不矜小節遂爾廢棄陳自命敢言顧苛求瑣細攻訐之疏多于建白漱蘭雖亦劾奏居多然皆朝臣疆吏之貪污有跡者不同陳之聽言不擇多虛寡實也湘濤自來論事能見其大慎行力學通達古今卓識高才一時巨擘又樵論奏亦伯潛之流但氣魄少寬耳兩人皆驕矜滿假處事論人又過苛刻如出一轍但張才識較陳爲勝平心次第才品並優首推粵督論才以又樵爲高評品則寶黃相等伯潛皆出其下五人之外依草附木如鄧承修輩自噲之屬

矣 數月來凡主戰者如左彭楊鮑劉尙總師干然皆中興功臣且無大過也滇撫粵撫皆以失機議罪咎由自取張以馬江之敗陳以荐舉非人既罪以謫戍矣鄧承修始以觀風望氣倖附時局屢邀殊擢今以救焚恭煦一疏忽奉諭飭加以議處于三人之定罪已可覘內廷意旨之不同于先也去年主戰則盡逐樞臣之主和者北李南曾皆奉嚴飭及數敗之後又降謫主戰諸君中朝先後處分既似輕率而意旨之寄亦示人太淺矣 張又樵以書生談兵卽予師干重寄和戰之樞又中操之攻戰蕩決既未身歷偏裨將卒素少心知到閩才三閱月軍柄又不使專法船入口阻之不聽擊之不能請戰不許是何異繼良驥之足而責以馳驟也予嘗論馬江之敗咎在當國不能獨責閩疆諸臣但又樵不應于敗後請罪疏中歸咎卸過且飾報戰績也然今日定罪寬督撫而獨苛又樵况更重于何如璋也有識者能無代抱屈耶予去秋在滬一日叔兄謁九帥歸爲言已許法使諒山之役撫恤五十萬兩予謂給銀之議當出之中朝以示懷柔而疆臣之主議者似不可擅許此議上陳必奉嚴旨

叔兄極以爲是次日果奉回任罷議之諭八月返閩子紹以閩疆諸帥奏報疏及張單銜請治罪疏示予謂又樵但當以匪才負重自咎請罪不應疏中歸咎怨憤且加粉飾與人攻擊頗笑其素負重名而無明識也兩公之護咎皆由幕府乏才此予去年以聞省帥有乏才之歎而深咎中興諸將不能禮士于平世也 聞烏裔說法人得諒山後擬爲犯粵西之隆州倘或爲陷則設防其地以杜我師之征進卽臺灣裔兵倘三月以先不能陷我諸城亦但于基隆經營巢穴不更力攻兩地敵軍除留踞外盡以北犯其遲遲者以續調兵輪船十六艘未入華界到後合隊大小共五十餘船擬由江陰犯長江以攻江寧也此計予去年早已料及願爲之籌恐更有甚于此者津沽凍解必有大舉今年時事大可慮也

二十二日福安李枝青西雲札記

卷四

云辛卯秋客延平見郡城天寧寺停櫬前和題

東鄉艾千子姓字按明史唐王時官御史卒于延平羅文正爲之殯未幾文正亦卒云云乃知確爲千子之櫬拋擲至今也辛卯距今又五十六年先生之櫬不知有爲

之營葬者否記出俟訪

二十三日聞鎮海礮中法船僅洞穿二艘而未沉溺已遁駛東倭修補云自法犯順以來我水師輪船爲轟溺者大小十二艘艇船不計焉長門礮臺僅損其載餉一船及彼出口盡毀我砲而去尙以獲勝報將弁兵勇以功蒙獎者千餘人今鎮海但拒不使入又以捷聞矣粉飾欺蒙殊堪一哭

七月十一日光澤何願船主政秋濤于咸豐己未爲陳新城奏保命以纂輯北徵彙編寫進賜名職方備乘加恩補缺後以員外卽補并在懋勤殿行走庚申淀園被寇原本散失其子芳棗以稿本呈合肥因屬黃子壽太史重爲編纂付刻初梓圖本過大因重縮刻圖說與全書一律卽此本也首冠歷次所奉旨諭次合肥讓序次凡例三十則并目錄爲一卷次卷首十二卷次本書六十八卷共八十一卷卷首爲恭錄聖諭三卷聖藻一卷及欽定之平定俄羅斯方略四卷皇朝通典通考會典各一卷本書分類目聖武述略共六卷